



Tir Yimyim

www.tiryimyim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :



Tir Yimyim



tir_yimyim



tir yimyim

TAPAK 8

**Venezuela nung tepuoker 104
chiokogo**

**Kerala Blasters-i striker
Kevin Yoke alizükogo**



VOL. XXIII ISSUE NO. 104 (ADOK 104) DIMAPUR SANGTENNÜ (TUESDAY) AENJETI (JANUARY) 27, 2026

₹ 5.00

Western Sumi nungeri telungpur teloktem kümdangtsü metetdaksür

Dimapur, January 26, 2026

(TYO): Western Sumi teloktemi NSCN/GPRN (Khango-Vusshe) dang parnok Ceasefire Monitoring Cell (CFMC) office belentsü tetuyuba agütsüba meyipa agiogo.

Parnoki iba takhangba meyipa agir saka amokmeren mesüra ozüing alema inyaksangshiba lephsia inyakra maremzüksü ta Western Sumi Hoho (WSH), Western Sumi Kukami Hoho (WSKH) aser Western Sumi Youth Front (WSYF) teloktemi ashi.

NSCN/GPRN (K-V) züngsemtemi January 19, 2026 nü Vikhuo nunger Kiyeto Zhimomi pur aoba aser züka merenshiba dak sendakba nung Western Sumi tongti teloktemi onük pezü takhangba agüja liasü.

Parnoki ahangba onüktem nungi asembo inyakogo aser pezübubaji Ceasefire Monitoring Cell (CFMC) office belentsüba indang liasü. Ajisüaka, yimjung maparen nung ajemdaker

takhangba onük pezübuba meyipa agitsü mulungtepogo ta Western Sumi teloktemi ashi.

Ceasefire monitoring cells tesem aser inyaksangshi nung Ceasefire Supervisory Board, state sorkar aser tanga teloktem ama third-party ketdangpurtem dena lir ta parnok ashi.

CFMC ya ceasefire ground rules kübok inyaksüla aser Ceasefire Monitoring Group/Board chairman ajanga agreement nung aliba ama inyaksangshi lateta yutsütsüla. Iba office ya amokmerentsü, tashiyim agi sen sarutsü mesüra sorkar ketdangsubaren atema mamshitsüla ta Western Sumi teloktemisa ashi.

Western Sumi nunger aliba tesemtem nung telungpur telok ajaki ozü züngsemtem, Sumi sensotem mesüra Naga nunger amokmerenba, pur aoba, teka sangshiba mesüra merenshiba tatalokbatem ajurura metoktsütsü ta parnokisa metetdaksüogo.

Arunachal nung NSCN (YA)-i AR tesepe ka amak

Dibrugarh, January 26, 2026

(Agencies): Republic Day anepdang Arunachal Pradesh kübok Changlang district nung telungpurtemi Assam Rifles tesepe ka amak.

Tanep 8:45 ako meta telungpurtemi Myanmar arrtsü anasa aliba Ranglum yimtsüng nung 4th Assam Rifles camp amak. Iba tatalokba atema NSCN-GPRN (Yung Aung)-i tenüing agiba metetdaksüogo.

Iba tatalokba sülen Indian security forces-i parnok takoksatem miimbangsü atema tesem ajunga longpang aser aser iba ajanga tasür mesüra teyirur

osang tejangja memeteter ta MIP, NSCN-GPRN (YA)-i sangdong ka nung metetdaksü.

"Iba tatalokba tejashi nung India sepaitemi tai maketba public nem timtem agütsü aser reshikangshio. Iba atema sasar saka asen lima kümzüka ayutsü atema onoki iba mapa inyaksüsa aküm" ta MIP sangdong nungsa shia lir.

Naga Army-i Naga lima kümzüka ayutsü tenangzükba nung noktaka lir aser maneni inyaksü. Tasütait Naga Army-i sepaitem aser secret agency tem tesem mashii nung amaktsü renema lir ta MIP-i sangdong nungsa shiogo.

Nagaland tableau ajanga Hornbill festival sayu



New Delhi, January 26

(Agencies): New Delhi nung Republic Day sentong nung Nagaland indang tableau ajanga Hornbill Festival sayua liasü.

Nagaland indang tableau tiyongsü nung Great Indian Hornbill liasü. Hornbill Festival ajanga self-reliant tourism akümba indang tableau ajanga osang sangoktsü.

Iba ecosystem nung teka mapa inyaktertem, sü ataktertem, aluyimertem, performers, lanur entrepreneurs, aser local

nisungtem sayua liasü. Crafts, textiles, music, cuisine, hospitality, aser creative enterprises ajanga rongsenketzüing maongkatem anguba indang tableau ajanga sayu.

Nagaland indang tableau ajanga lanur tashi itdaksüba, sobaliba skills asentenshiba aser sobalibaren kümzüka ayuba indang sayu. Senmang dak amendakba tourism ajanga maitsü akangshir aser ajak külemi renloker ta asüba iba tableau ajanga metetdaksüogo.

CM Rio-i Naga yimten latettsü; FNTA onük indang jembi

Kohima, January 26, 2026

(TYO): Naga yimten melatetba ajanga Nagaland renloka aoba nung tetsükdaksü ajurur aser iba atema state sorkari kanga temulung agütsür ta Chief Minister Neiphiu Rio-i ashi.

Kohima nung 77 buba Republic Day amungdang CM Rio-i olemtep nung adenertem aser sendaktepa alirtem ajaki nübortem taginübatem akhümtsübütsü aser külemi longjemer olemtep tembangtsü ayongzüker ta ashi.

Naga yimten tebilemtsü ya kanga dang tongtipang lir aser iba ya melatetba ajanga sorkar ketdangsubaren, investment aser lokti-rongsenketzüing tejakleni aoba nung tetsükdaksü ajurur ta paisa ashi.

"Political Affairs Committee (PAC) nung minister, advisor tem, political party tem nungi teshimtet nübotem aser Nagaland nungi Member of Parliament ajak dena lir. Mapang shia PAC senden amener aser yimjung maparen nung teyariteper tajung ka ama inyaka aotsü" ta CM Rio-isa ashi.

"Asen nübortemi aginüba ya meyutsütsüla. Sendaktepa alir ajaki memenu dang maongka agitsüla" ta paisa shisem.

"Eastern Nagaland asoshi mapang talangka nungi tebilemtsü khuret bena arur. District trok nung terenlok mapatem shitak meinyak aser tang tashi tanga district tem memenepi lir" ta CM Rio-isa metetdaksü.

State sorkari Eastern Nagaland People's Organisation (ENPO) den Frontier Nagaland Territorial Authority (FNTA) tentettsü takhangba atema angatettepa inyaka arudar ta pai ashi.

State sorkari India sorkar dang tebilemba aser tangatetbatem lemsatopogo aser sorkari olemtep aser amalitep

ajanga mangatettep alibatem angatetteptsü tenangzükba lir, ta Rio-isa ashi.

"Nagaland nung law & order kanga junga lir aser linük nung sünepe aliba state tem rongnung ka lir. National Crime Records Bureau's Crime 2023 report nung Nagaland nung ozüing alema inyaksangshiba kanga ajemba shiogo. Iba atema Nagaland Police, security forces, district administrations aser civil society organizations ajak nem tenüingsang agütsür" ta CM Rio-i metetdaksü.

Nagaland police-i cybercrime response tashi itogo aser narcotics alema kanga akanga inyaker. Yaküm police-i NDPS drugs seret 230 aser synthetic drugs unit lakh 1 shi puogo. Kasa mapang ken o 135 benok aser nisung 218 apu ta paisa ashi.

"Nagaland-i 1963 nung state akümba sülen linük den külemi yaritepyonga arur. Nagaland nung shisaliok tsütsü NESIDS (OTRI)-funded in-service teachers' training tembangogo aser Medziphema nung examination centre amenokogo. Maneni Nagaland University den yaritepa language teachers asoshi ita asem certificate course agitsü aser higher education rejutem nung academic aser administrative buildings yangluogo" ta CM Rio-i ashi.

Paisa Nagaland Scholarship Nodal Cell tentetba aser Coaching Centres 2025 nung Guidelines mulunga agizükba indang jembi.

"Technical education sector nung polytechnics asempi NBA accreditation ngutetogo, Khelhoshe Polytechnic Atoizu degree college ka ama ajungkettsü atema mapa inyakdar aser technical graduates atema Japanese company ka den MoU sign asütsü inyakdar" ta CM Rio-isa metetdaksü.

Construction Skill Development Council den külemi

construction sector atema Skill Centre ka yangludat. Iba dak alia Labour Department ajanga online registration aser licensing system tenzüko go ta paisa ashi.

CM Rio-isa agriculture, horticulture, animal husbandry, fisheries aser sericulture indang jembidang PM-KISAN kübok aluyimer 2.38 lakh nem Rs 763 crore agütsüba ashi.

Infrastructure tsütsü lenmang, apu aser water supply maparen kanga junga inyakdar. NESIDS, SASCI aser PMGSY kübok tongtipang lenmangtem yangludat aser national highways nung aputem yanglushirta CM Rio-i ashi.

Dimapur nung Nagarjan substation upgradation asür, renewable energy maparen ulushir, Jal Jeevan Mission kübok mapa inyaker aser Asian Development Bank nungi urban infrastructure planning inyaker ta paisa metetdaksü.

State sorkarisa tourism, culture aser youth engagement asoshi inyaker aser 26 buba Hornbill Festival nung nisung aika arua liasü. Tourism infrastructure maparen nung Mon nung Konyak Heritage Complex renemogo ta pai ashi.

"Healthcare tsütsü Ayushman Bharat PM-JAY aser Chief Minister Health Insurance Scheme ajanga cashless treatment agütsür. Tang tashi nung 5.78 lakh cards agütsüogo aser Rs 450 crore tema sorkari agütsüogo. Ano, Ayushman Bharat Digital Mission kübok maparen inyaka arudar" ta CM Rio-isa ashi.

Tanü state-level function nung CM Rio-i linük wako sala aser parade sema senzü. Iba sentong nung central aser state forces nungi marching contingents 17 liasü.

Maneni, Nagaland kübok tesem balala nung Minister aser Advisor temi Republic Day sentongtem nung shilem agiogo.

Jan 30 & 31 Ao kin temenen nangzükba sarasadem sentong akatsü

Mokokchung, 26th JAN

(TYO): Ao kin Tsüngrem dang temenen nangzükba sarasadem sentong ka January 30 & 31 anogo ananü yangi Mokokchung town nung akatsü asoshi kanga mazüingi renemtepdeki, ta tanü Hotel Whispering Winds, Mokokchung nung osangbener senden ka ayonga akadang Mokokchung Town Ao Baptist Churches Mission (MTABCM) ketdangsürtemi metetdaksü.

Iba sentong January 30 (Hogulbar) nüji aonung 5:00 ako nungi tenzüka Mokokchung Town Baptist Arogo (MTBA) tenla kidang akatsü aser iba aonung ABAM executive secretary, Rev. Temsu Jamir aser

Ao Senden Tir, Marsanen Imsong nadi tayongzükba o jembitsü. January 31 (Honibar) nüji ghonda trok - anepdang 6:00 nungi anüngdang 12:00 ako tashi Imkongmeren Sports Complex, Mokokchung nung lumitsü sentong renema lir.

‘2025 küm Tsüngremi mangdang ka agütsü aser ibaji Ao kin yamai dangbo malitsü, asenoki Tsüngrem tsüngdang aibelenba temenentem ajak nangzüksü atema tatok meshiba sentong ka 2026 nung ayonga akatsü bangiemtep, aser ibai Ao kin tatok meshiba sentong ka asünung, denomination tebendang kecha malitsü, telungpur/tamapur, takar-

sensaker, tulur-tilar aser tain-tanur ta kecha mebendangi ayongtsü maparen balala inyaka arudar’, ta Rev. Pongnen Longchar-i metetdaksü.

Iba dak sentakba nung NCRC Mokokchung aser Pentecostal Church den ano Aor CSOs - Ao Senden, Watsü Mungdang, Ao Kaketshir Mungdang, All Ward Union Mokokchung Town, Mokokchung Town Lanur Telongiem, linük tenzüker aser lokti balala den ajurutepa jembidang, pamokia ibai Aor asoshi kanga dang nüngdakba sentong ka lir aser Tsüngremi mulungba ka ta pela shishia agizüka liasü, ta pai tatalokba kar lemsatop.

(Maneni tapak 2 nung...)

Mezüngbuba Mokokchung Film Festival agiogo



Dimapur, Aenjeti/January 26 (TYO): Mezüngbuba Mokokchung Film Festival sentong takok ngua January 25, 2026 nü Town Hall, Mokokchung nung agiogo. Iba sentong ya Mokokchung District Administration ajanga Ministry of Information & Broadcasting aser NFDC Cinemas of India den lungjemer ayongzüka liasü.

Sentong nung Assistant Commissioner of Mokokchung, Ajay Moktan, IAS ajanga pela agizükba o jembidang Deputy Commissioner, Mokokchung, Ajit Kumar Verma, IAS dak mangdang tajung yur iba sentong yangluba asoshi tenüngsang agüja liasü.

Iba sentong nung ADC Mokokchung, Atsunga Walling-ia o tatsüka jembidang cinema ajanga tanü tendak tongti shilem agiba indang lemsatep. Nüburtemi kanga jangja meteta aliba actor Bendang Meren Ao ajanga iba benjongmung nükjidong lemsatepa liasü.

Sentong nung EAC Mokokchung, Kewimesin Nriame menden liasü aser Teyalo Seb, Pastor, Tenymia Church, Mokokchung ajanga sarasadem.

Iba sentong nung Hobi Tsang, Asungla Aodang, Lipokmeren, Bendang Meren Ao, Easter Konyak aser Mokokchung Dance

Community nungeri shilem balala agia liasü.

Iba sülen Raj Kumar-i direct asüba film tatsüka PLASTIC nüngja agütsür sayua liasü. Tetendangertem Bendang Meren Ao, S. Neangbah Konyak aser Yangerkumla Lemtur liasü.

Mezüngbuba Mokokchung Film Festival nung takok balala angurtem : Best Film - PLASTIC (Directed by Raj Kumar); Best Director: Anok Pongen (Jeevan Ekta Kitap); Best Actor: Lanusunep Longchar (Longrapong Sama); Best Actress: Tulumenla (The Real Identity From Above).

Sentongtembanga Bungkhao Konyak, EAC (P) ajanga melepzüing o jembia liasü.

Dimapur nung Nagaland-Japan Connect 2026 ayongzüksü

Dimapur, Aenjeti/January 26 (TYO): Government of Nagaland-i Investment and Development Authority of Nagaland (IDAN) ajanga Centre of Excellence for Foreign Languages (CoEFL) aser danga institutional partners den lungjemer January 28, 2026 anepdang 10:00 ako nungi tenzüka Integrated Business Hub & Innovation Centre Dhobinala Rd, Forest Colony, Dimapur nung Nagaland-Japan Connect 2026 ayongzüksü renema lir.

Iba sentong ya Kochi Prefecture, Japan nung July

2025 nung Memorandum of Understanding ka zülutepba Government-to-Government partnership maparen tetenzüker asütsü.

Ibai Nagaland Chief Minister Dr. Neiphiu Rio-i anir ketdangsürtem Japan-i aoba ajanga atongtetba lir, kong Government of Japan, Indian Ambassador to Japan aser Japan nunger company tajung aser tulu tem den ajurutepa jembishinü akatsü.

Nagaland-Japan Connect 2026 ya küm shia ayongzükbä sentong ka asütsü mangdang lir, koba ajanga international

cooperation tashi itshitsü, human resources development nung terenlok alitsü, cultural exchange, research, policy engagement aser shishilempaba tsütsü maongka balala bushiteptsü.

Iba nungya skill development, foreign language training, recruitment facilitation aser cultural exchange amala maparen inyakyim ka kübok alitsü.

Iba sentong nungya Japan nung mapa inyaksü asoshi shisatsü agütsütsü, Japan nungi company balala aruba nungi mapa asoshi interviews alitsü.

Jan 30 & 31 Ao kin temenen ...

(TAPAK 1 NUNGI...)



Ao kin Tsüngrem dang temenen nangzükbä sentong dak sentakba nung osangbener senden ka Hotel Whispering Winds nung akadang MTABCM ketdangsürtem noksa nung angur. Mokokchung, 26th January, 2026

Iba sarasadem sentong nung asen tetsü tebou nungi tanü tashi Aori Tsüngrem tsüngdang aibelenbatem onük balala nung nisung 12-i mapang lemsar anitsü. Iba sentong ya Aori kukuka Tsüngrem tsüngdang - kija, kibong, arogo, lokti temenen ajak nangzüksü aser Pai asenok nem tatok agütsütsü, iba ajanga Tsüngremi Ao kin tanaben semdangtsü aser tetuyuba tasen agütsütsü, aser Ao kin nem temoatsü balaka meküploksütsü tamang akar, ta Rev. Ponenisa ashi.

Iba sentong dak sentakba nung Jan 4 nungi tenzüka Ao arogo ajak nung mapang lemsar sarasadem yinzü agiyonga arudar aser ibaji Jan 29 nü tembangtsü. Iba sentong nung Aor legislator-tem den Lok Sabha MP aser Chief Secretary-i anir Kohima nung Aor tulur ajak jaoka lir, ta

Rev. Dr. Bendang Longkumer-i metetdaksü. Iba sentong nung tesem balala nungi nisung meyi tenet-ti bosa arutsü imlar, ta paisa shisem.

MTABCM kübok arogo 10 dak alaka ano iba sentong asoshi shirnokisa tenla balala agi yaria arudar, parnok ajak dang pelaba Rev. Puryapangi metetdaksü. Iba sarasademba ya jangja-jangja aginür, anungji, Aor ajaki iba anogojibo mapa kecha meinyaki ret-reta agizüka amungtsü ayongzüker, ta paisa mepishia metetdaksü. Aor lokti ajak ayimjemtsü merangogo, saka kar danga mayimjemi lira, iba osang ajanga ayimjemdaksünür, ta paisa shisem.

Koda mesüi kuli balala ajanga tsüngtong marutetertem asoshi MTBA Mokokchung YouTube channel nung Live Stream

yoktsü, anungji, pei alidak nungi adentsü mepishir, ta tayongertemisa metetdaksü.

Ao limai Khristan yimsü arur joko küm 154 buba arur, Ao kin asendenshi sentong tulu ayongba dak alaka Ao kin rangben mejeta Tsüngrem dang temenen nangzüka sarasadema amungbabo ibai mezüngbuba asütsü, ta Rev. Dr. Bendangi iba osangbeneri metetnüa asüngdangba ka langzüdang metetdaksü. Iba sentong ya maneni agitsü asü? ta asüngdangdang, ibai maneni agitsü tabo lemteta maka, saka Tsüngremer tejembiba aliba ajanga iba sentong ya ayonga akar, ta pai langzü.

MTABCM telungjem ya taoba küm 25 jakdang tenzüker aser iba telok ajanga tesem balala nung mission mapatem inyaka arudar.

Mokokchung nung 77 buba Republic Day mungogo

Dimapur, Aenjeti/January 26 (TYO): Linük ajunga den külemi Imkongmeren Sport Complex, Mokokchung nunga January 26, 2026 nü 77 buba Republic Day munga liasü aser Advisor, Law & Justice and Land Revenue, Nagaland, T.N. Mannen-i linük nisan salatsü aser Republic Day Speech agüja liasü.

March past nung 2nd NAP Bn. Alichen, DEF Mokokchung, 13thNAP (IR) Bn. Yajang, Home Guards, Mokokchung, Ex - Servicemen, Mokokchung District BS & G, NCC, MGHSS aser Band Party (2nd NAP Bn. Alichen) nungi shilem agi aser Parade Commander Asstt. Commandant 2nd NAP Bn. Alichen, Zareni Yanthan, NPS aser Second in-Command ABI, K. Meren Jamir, New Reserve, DEF, Mokokchung liasü.

Iba sentong nung Zee Walok Cultural Troupe, Ungma aser

Chang Union Cultural Troupe, Mokokchung ajanga sobaliba tsüngsang agi shilem agi aser HoDs aser All Ward Union, Mokokchung tsüngta arr atsütepa liasü.

Iba sülen Women Entrepreneurs, Mokokchung, Department of Health and Family Welfare, Department of Animal Husbandry & Veterinary Services, Institute of Communication and Information Technology, Mokokchung, Nagaland, Mokokchung District Legal Services Authority, DRDA, Department of Horticulture aser Department of Agriculture ajanga lapokba stalls tem Advisor Mannen-i semzüksü.

Nikongdang DC XI aser MDVFA tsüngta football exhibition match asaya aser Technical Team aser tanüngba department tsüngta tetsürtem Penalty Shootout asaya liasü.

Kohima nung Drone School & Drone Centre of Excellence semzükögo



Dr. Neiphiu Rio-i January 26, 2026 nü Nagaland nung mezüngbuba Drone School and Drone Centre of Excellence semzüksüba noksa nung angur.

Dimapur, Aenjeti/January 26 (TYO): 77 buba Republic Day anogomung nung shilem ka ama Nagaland GIS and Remote Sensing Centre, Kohima nung Nagaland Chief Minister Dr. Neiphiu Rio-i January 26, 2026 nü Nagaland nung mezüngbuba Drone School and Drone Centre of Excellence semzüksüoggo.

Ibai lanur nem advanced drone technology skills agütsütsü aser yimya tasentem amshia employment agütsütsü nükjidong nung Planning & Transformation Department kübok State GIS & Remote Sensing Centre (NGISRSC) indang asalendong ka lir.

Chief Minister Dr. Neiphiu Rio-i iba sentong nung jembidang, sorkar ketdangsüba, terenlok maparen aser nübur tenzüksü asoshi modern technology amshiba tsütsü ibai tongtipang mera ka lir, ta ashi.

Department-i sentong tajung yangluba asoshi tenüngsang agütsüdag, alima nung drone technology aser networking tsütsü Nagaland-i temulung agütsür aru, aser tamalenbo drones ya raradak timba amshi, saka tangbo terenlok mapa asoshi tajunglen nungi amshia kumogo, ta Dr Rio-i ashi.

Iba yagi tarutsü nung timtem balala ajurudang State renema aliba nung tali tashi itshitsü aser drone technology tajungba nung

amshiba tsütsü state ya lenir ka ama akumtsü, ta pai ashi.

CM-i Drone School and Drone Centre of Excellence commemorative plaque lapoktsüdag Deputy Chief Ministers T.R. Zeliang aser Y Patton, Chief Secretary, Sentianger Imchen aser Home Commissioner, Abhijit Sinha, IAS nunger densema liasü.

Drone School nungya DGCA-compliant Remote Pilot Certificate (RPC) courses den short-term non-DGCA programmes in FPV flying, drone repair and maintenance, aser drone data analysis and mapping amala course tem agütsütsü.

Training mezüng batch nung nisung 50 lir, koba Nagaland Skill & Entrepreneurship Development Mission (NSEDMD) ajanga sponsor asü aser January 27, 2026 nungi tenzüksü aser training angati agia placement assistance aser industry linkages agütsütsü.

Iba reju nungya classrooms, laboratories, simulators, assembly workshops aser Tsiesema aser Thizama nung designated flying grounds alitsü.

Iba ya Centre of Excellence for UAV research, innovation ama alitsü aser sorkar indang department balala nem technical teyari agütsütsü.

Drone School ya State Plan for FY 2025-26 kübok sen 2.50 crore agi renema liasü.

Alima tensa mejungaka India ainer: Tir Droupadi Murmu



January 26, 2026 nü Kartavya Path, New Delhi nung 77buba Republic Day parade nung India Tir Droupadi Murmu den European Commission Tir, Ursula von der Leyen aser European Council Tir, Antonio Costa nunger aruba noksa nung angur.

New Delhi, Aenjeti/January 26 (Agencies): Republic Day anogomong jakdang Amongnü aonung India linük temzüng yanglurtem nem tenügsang agüja Tir Droupadi Murmu-i, linük temzüng yanglurtem ajanga linük tamendakdak tashi itta yanglutsü aser linük temzüngtem ajanga linük longjemdaksü, ta metetdaksü.

Laisa, linük naklu ken 'Vande Mataram' ajanga India nunger melung shia nung linük meimdaksütsü shisa apuoktsü, ta metetdaksü.

Laisa, kobi melii India ya alima nung rongsenkettzüng tulutiba linüktem rongnung tasembuba akümtsü, ta metetdaksü.

"Alima nung tensa majungyonga India maneni indar. World-class infrastructure yangluba ajanga asen rongsenkettzüng tashi tanaben yangerdar," ta lai ashi.

"Alima puti otsü nung asen linük temzüng ya republic tulutiba indang tamendakdak document ka lir," ta lai metetdaksü.

Tiri, "Linük nüchiso anguba sülen rongsenkettzüng aintsü atema tongtibangtiba telemetba agibaji GST lir. Iba ya ajanga 'linük ka, market ka' inyakyim tenzükgogo. Tawa GST inyakyim yanglushiba ajanga maneni asen rongsenkettzüng tashi itshitsü," ta ashi.

"Labour reforms dak

sendakba nung Labour Codes pezü latetogo aser ibaji ajanga mapa inyakterem ajangzüksü aser terenlok keraa alitsü," ta lai ashi.

Democracy tashi itshidaksüba aser linük terenlok nung tetsürtemi shilem agiba dak sendakba nung lai, tetsürtemi tashi amshia kanga yakyaka shilem agiba ya India atema kanga tongtibang, ta ashi.

"Health, shisaliok aser rongsenkettzüng tsütsü tetsürtem nem tashi agütsüba ajanga lenla aika nung tetsürtemi shilem tajung agir. Tangbo lenla aika nung tetsürtem kanga tejakleni odor," ta lai metetdaksü.

US, Australia, Japan, Finland aser Sri Lanka-i R-Day salem lemsatep

New Delhi, January 26 (Agencies): Hombarnü India nunger Republic Day anogomong nung US, Russia, Australia, Japan, Finland aser Sri Lanka densema linük aikati India den iba anogomong salem osang lemsatep.

US Ambassador to India, Sergio Gor-i X ajanga, "Tepela Republic Day, India! Tang mezüng Republic Day Parade nung adenba ya maongka tulu, iba ya India temzüng aser democratic tanela benjung ka lir. India nunger anüng nung US nung yangluba tayimtsü ayimba ngua pelar, aser iba ya US-India strategic partnership tashi temaitsü lir," ta metetdaksü.

Japanese Ambassador to India, Ono Keiichi-i, "77buba India nunger Republic Day salem lemsateper. India Tiri

jaokba ama iba benjung nung adentsü yongyar," ta metetdaksü.

Australia High Commissioner to India, Philip Green-i X ajanga, "January 26-anogo ka, linük ana benjung - Australia Day aser India Republic Day. Tepela Republic Day, India! India nung onok indang missions nung külem tenzükertemi yangi aliba oshi balala ajanga salem osang lemsateper," ta metetdaksü.

Sri Lanka Ministry of Foreign Affairs-i X ajanga, "77buba India nunger Republic Day anogomong/ 26 January 2026! nung Sri Lanka sorkar aser nüburtemi India sorkar aser nüburtem den salem lemsateper," ta metetdaksü.

India nung aliba Finland Embassy-i X ajanga, "Onoki

India nung medemertem, partners aser nübur ajak den tepela #RepublicDay salem lemsateper! Finland nung alirtem ajaki India nunger den iba anogomong salem lemsateper," ta metetdaksü.

China Tir Xi Jinping-ia India ya kiyonger tajung ka aser partner tajung ka, ta shia iba anogomong salem lemsatep.

US Tir, Donald Trump-i India aser US na tsünga akhidang nungi tesendaktep junga lir, ta shia iba anogomong salem lemsatep.

Russia nunger ketdangsertemia India nunger oshi balala- Oriya, Bengali, Malayalam, Punjabi, Urdu, Tamil, Assamese, Sanskrit, Gujarati, Telugu, Kannada aser Marathi oshitem ajanga India den iba anogomong salem lemsatepogo.

Canada PM Mark Carney-i India semdangtsü

New Delhi, January 26

(Agencies): March ita 2023 küm Sikh separatist mezüngbuba hopta nung Canada Ato kilonser, Mark Carney-i India semdangtsü, aser iba mapang nungji linük ana tsünga energy, minerals, nuclear aser technologies sectors nung tezüngzüktep aika agitsüa akok, ta India High Commissioner to Canada, Dinesh Patnaik-i metetdaksü.

Patnaik-i, India semdangba mapang Carney-i uranium supply, totzü aser gas, tongtibang minerals, artificial intelligence, quantum computing, shisaliok aser sobaliba tsütsü India den tezüngzüktep aika agitsüa akok, ta metetdaksü.

Küm 10 tashi uranium supply asütsü (Canada nunger dollar sen billion 2.8 shi jenjang) atema linük anati tezüngzüktep agitsüa akok.

Tan hopta India semdangtsü alisang Canada Energy Minister Tim Hodgson-i, tang aliba Canada-India nuclear agreement kübok 'nuclear' tsütsü amalitepa inyakba züngoktsü, aser tongtibang sectors ji energy & mining asütsü, aser iba nungji crude oil aser LNG transactions adentsü, ta metetdaksü.

Taoba mapang Canada Ato kilonser, Justin Trudeau yimsüsüba kübok India aser Canada na tsünga tesendaktep kanga mejungi aküm, aser tang Carney yimsüsüba kübok pai India den tesendaktep

yanglushitsü meranger.

Hardeep Singh Nijjar tepsetba nung India sorkari shilem agia lir, ta Justin-i India nem tai tongloktsüba sülen linük ana tsünga tesendaktep raksaa liasü.

India aser Canada tsünga Comprehensive Economic Partnership Agreement (CEPA) atema March ita nungi jembii tenzüksü, ta Patnaik-i metetdaksügo.

Küm ana tashi linük ana tsünga shishilembaba tsütsü ken o mejembii aruba sülen asentenshir jembitsü atema November ita nung bangjema liasü aser CEPA atema jembii tenzüksü sülen küm ka tsünga tezüngzüktep agitsü imlar, ta Patnaik-i metetdaksü.

Patnaik-i, taruba ita India National Security Advisor-i Ottawa semdanga linük ana tsünga Intelligence lemsateptsü aser security atema jembitsü, ta metetdaksü.

Paisa, kobi melii Commerce Minister Piyush Goyal aser Finance Minister Nirmala Sitharaman natia Canada semdangtsü, ta metetdaksü.

Nijjar tepsetba ken o dak sendakba nung Patnaik-i, iba ken o nung tai tonglokja alir nisung pezü anema Canada nung aliba court ka nung ken o angadangdar, aser pa tepsetba ken o nung India nunger shingaia shilem agia melira India-i mera agia inyaksü, ta metetdaksü.



January 26, 2026 nü Kartavya Path, New Delhi nung 77buba Republic Day anogomong nung army tem indang helicopter sayaba noksa nung angur.

IndiGo-i Iran kübok yimti pezü tashi senzüba tayimtsü thinener

New Delhi, January 26

(Agencies): Hombarnü IndiGo-i, tang Iran aser temeket nung tensa mejungi aliba nung ajemdaker Tbilisi, Almaty, Tashkent aser Baku yimtitem tashi senzüba tayimtsü ajak thinenogo, ta metetdaksü.

Security tensa asadangba sülen January 26, 27 aser 28 anogotem tashi item yimtitem tashi senzütsü aliba tayimtsü ajak thinenogo, kechiyong passenger tem kümzüka alitsüji

tongtibangba, ta IndiGo-i metetdaksü.

IndiGo-i sangdong ka ajanga, "Iran aser temeket nung aliba region nung tensa onoki mita repranger aser iba nungji ajemdaker tayimtsü service reprangshir. Tang tensa mejungi aliba nung ajemdaker January 26, 27 aser 28 anogotem nung Tbilisi, Almaty, Tashkent aser Baku yimti tashi senzüba Indigo tayimtsü ajak thinenogo," ta metetdaksü.



January 26, 2026 nü New Dehli nung 77buba Republic Day anogomong nung Ato kilonser, Narendra Modi-i National War Memorial nung asürtem nem akhüm agütsütsü arudang pai Chief of Defence Staff (CDS) General Anil Chauhan, Chief of the Army Staff (COAS) General Upendra Dwivedi, Chief of the Naval Staff (CNS) Admiral Dinesh K Tripathi, Chief of the Air Staff (CAS) Air Chief Marshal A P Singh aser tangartem agizükba noksa nung angur.



TIR YIMYIM YIMOBILEM (EDITRIAL)

DIMAPUR TUESDAY, JANUARY (AENJETI) 27, 2026

Temzüngi aginüba amato masü !

India yimten nüchiso 1947 kum August 15 nü angu saka bendanger temzüng ozüng agi amokbanger aliba kin ka nüchi kümteta yimten tasen ka latettsü asoshi pei kin aser pei nübortem sobaliba dak apet, pei linük meyong temzüng ozüng latettsü asoshi kum ana agia India nung tazüng temeteterem rongnung shisalemsatepa aruba sülen , 1950 kum January 26 nung linük temzüng tasenbaji India temzüng asütsü yimteni agizüka benshitsü tenzük, iba jagi taküm 2026 kum yashi January 26 nü India nung 77 buba Republic Day, Linük temzüng agizüka benshitsü tenzükba anogo 77 buba mongogo. Aji oda, iba linük temzüng yagi India ya lasasa yimsüsüba aser nübortemi mulungba nung yimsüsürtem shimteta yimsü asüba Democratic yimten aser iba linük nung tamangba yimsü ajak sademsadema amangtsü aser sayutsü akokba 'Secular' lima ka asütsü ta okila nung shia tenzüker. Iba tangatetba nung India telungjem meraksai 1950 kum latetba linük temzüng kübok linük ajaklen tuluba nungi shir tilatiba tashi yashi Republic Day pelatepa mongogo. Ajisüaka, teratatsü kaji, yashi ama linük temzüng takok ngua amungba anogomung amungdang, linük temzüngi senso shia nem temeten aser maongka agütsüba onük tongtibang ka kenyongi mesüshi aser meshisem amungba onükji tamangba yimsü tsütsü senso shia nem pei amangnüba yimsü amangtsü aser pei amangba tamangba yimsü indang sayutsüngia jajatsü temeten agüja aliba 'Securalism' onük liasü. Ashiko, yashi linük temzüng takok ngua benshia aruba anogomung amungdanga, linük tesem kar nungbo tamangba yimsü tsütsü mepetmesü adoker alitsüa akok. Atangji, India ya Hindu nung teimba ser aliba lima lir, anungji tanga tamangba yimsü Muslim aser Khristan ama liaka, parnokia Hindu yimsüji akümtsübutäla aser Hindu nungertemia tangar tamangba yimsütemji mezüngmeshi masütsüla. Linük temzüngi aginübaji aji lir. Ibaji angateta, India nung kin kidong aser oshi dang masü saka tamangba yimsüa alima nung nisungtemi amangba tamangba yimsü ajak sademsadema amangba lima ka kuma taoba kum 76 dak tali lia aruogo. Ajisüaka, tang taoba kum ishia tsüngda India tesem aika nung tamangba yimsü tsütsü meputep adoktsüsa yimten lenirtemi tesempa o yimjak nung jembir aser temzüng ozünga lateter, anungji tangbo India ya temzüngi aginüba ama melitetba linük ka kuma odagi. Aji oda, tesem aika nung Hindu aser Muslim na putepa meliteteter aser tesem aika nung Khristan-tem timtem aser reshikangshi ajurur. Iba ama tamangba yimsü tenüng nung nübortem rongnung meimtepa, yaritepa aser putepa alitsü melen, tamangba yimsü tenüng nung nübortem rongnung tsükchiteptsüsa yimten yimsüsürtemi inyakbaji India asoshi takoksa aser lendong adokdaksütsü inyakba sentongang ka asütsü. Koba tamangba yimsü südirsüaka, tamangba yimsüibo temeim mapa inyaksü indang sayur. Ajisüaka, temeim sayutsü melen koba yimsüi tsükchiteptsü indang sayur, iba yimsüjibo alima aser anüng yanglusang Tsüngrem nungi aruba tamangba yimsü masütsü. Atangji, yimsü karibo Tsüngrem masü saka Tsüngremi yanglubatemang külemer. Aji oda, asen tsüraburtemia Tsüngrem masü saka Tsüngremi yangluba ita anü aser süng long külema aru. Tanüa India nung nütsüng teimbai amangba Hindu yimsüi Tsüngrem masü saka Tsüngremi yanglubatemang külemer. Iba jagi, tanü linük nung temzüng latetba anogo bilemteta amongba anogo nung temzüng nung aliba temeten indang masü saka Tsüngremi yangluba asen tetsü taso lima külemtsü asoshi 'Vante Mataram' indangang süoki taiba ia sayur. Atangji, tetsü taso lima meimtsü aser kümzüka ayutsübaji senso ka mapa saka tekülemba nungbo, tetsü tasoli masü saka tetsü tasoli yanglusang aser moatsüsangang külem nung koda shitak aser koda nüchi tangatetba mapa ka süla. Tanü linük nung tamangba yimsü tsütsü meputep adoka mesüngjemtetbaji, tanga kuli agi masü saka Tsüngrem masü saka Tsüngremi yanglubatemang külemtsüla ta angatetba agi lir. Iba jagi linükbo yimten nüchiso angu saka nisungtembo nüchi maküm ta rongrongteper.

OLEMSABANG

MERAJEMBA TEKUREM

~ L.Temjenwapang

(Iba Yim dangjem otsü ya Tir Yimyim aser Bookipedia nati ayongba toktep nung shilem agirtem)

(Yashi adok nungi...)

Tetsü-i langzü aya tebu nai Ojala meimba agi khu melenzüksü asüngdang, kanga pelar, saka nenok asüng nungi kibalembutsü idangji kibong khuret agi benü mebenü ta masü khu ajak abentsü anungji tanübo ojai bendi jong nebu nena tama sang ta langzü. Wangshiba mulungjang nung kanga kongshi aya

ketsü i tarutsü atema tena yamai khuret bentsür- a na ya ta tetsü temeimji ano banüji tali jangja. Kum tepiyong alu wadang balala inyak dang belemba ajak ama sütöksünema senzütsü jangra pelatepa aoba mapang, joko arem tiyong ka nung jaja dang lenmang tezü külen ola ka lasa-lasa nunga angashi anungji par asemprong zep ta nokdak aser angadang, idangji ano olaji sa nunga angashi. Anungji Wangshibai tanem tanemi oa reprangdang nung nisung ka longtaka lir ama angu. Yakta ola tulu adoka oa nisungbaji meso, saka temang ajakji azü agi yimpanger temang ajunga zübo agi sünger liasü. Anungji yakta ajungteper lendi jagi bener adok aser reprangdang nung pa temba Rongjenba liasü, idangji Wangshiba-ji kanga aoksa aser temba- temba ta jashia ajep, idangji tetsü o tebu na jaki yakta azü jemdangtsü süngo tu kar bendena menoka züboji amtsü aser tebu- i ashi; ya yakta ki atongba tajungba asütsü, anungji tebu nai nü temba-ji pongang aser tekeratiba nung yim bushidi ta sür joko meyiba kidangi adok, kechiba süra obala Rongsenba jaki pa yiruba yimyaji meteter liasü. Joko ki tonger kiyong kinar ajak sentepa anogo tepiyong yariteper nikongtsütsü Rongjenbaji tera nisungba yimdangi arunung tatalokbatemji asüngdang.

Rongjenba; Ozü tsük ano tera ki metongsepi ali nung ni tanübo aji benmatsü nükjidong nung tanep tera jilia apusoa aoba mapang alu lenmang nungji ajungbena Kiyi ka arua ponglok, kü ket nung nok dang liasü anungji kiyi denji rara melangtep dang ni kanga yiru aser azü yimtokba ajanga ni kanga lula aküm.

Kiyi jaki ni ngusetsü lia nisung ola kar angashia kiyi- ji ajen aser ni kecha memeteti aküm. Nisung ola angashiba-ji Wangshiba, tetsü - tebu par asem ola liasü, idangji yakta arem nung tebu-i ashiba tu bilemtet. Yiru-a aliba tesem nungi yakta anshitsü tebu-i kanga aritepa ajungmeso, ibatu obalai meteter liasü ta idangjiang rajema-a aru. Temba, nisung ola tu kütsü, kübü ozü asem otsü atongteba ayongi aorba. Rongsenbai; Aya temba tanü ner kibongi ni kümzüka ya ni kodanga mamatsü kü tepang agi meshitetba pelar ni yabo mamatsü.


Joko alima ajungalen zulutsü, azüngtsü, meteta aru, shishilembatsü tenzük yimtsüng nungji, lanurtembo pei wadang balala asoshi jila (town) aser yim ka nungi ka ta jajatsü tenzük, talongtsütem balala asen lima tonga aru, tsümartema asen lima shishilemba senzü, ano asenoka nungdaktem jaja-a shishilembatsü kanga hobita aküm. Iba mapang kenü anogo anünglak nung tayimtsü ka arüa ao. Idangji yimertemji ajak kima len adoker alemli yimdak tambur ka asüba lepko nung ya kechi shiruru ta süngmanga reprangtepa tu shiruru masü, tayimtsü ka süirba liasü ta parnok menütepa panüjiang metet.

Mapang kobi meli-i Wangshiba par tzükong len Mohory mapa ka angu. Yamaji anogoshia pa mapa nung lenmang repranga jajaba mapang bendangtsür ka junga ngushi, laji mapangshia parnok mapa inyaklenji sa süir, idangji menürema jembili tasa asür. Ayirla jembishinüji tepuatsüka liasü, soro kanga jungrabo masü saka aso ajenbo asüketa motonger jembishinüji tejangja, ano osüjia tanganütsüka jembiteter, ano iba den külemi lai tsümar o-a ka ana inoksemasa jembir. Joko Wangshibatu la jembishinü nungji jung junga pua aser mapai aotsü tu matateter, anogoshia pa mapai aotsü tejangrabaji onsara tulu liasü, kechiyong pa tebilemba ka lir. Mapang tatsüka latu lenmang nung mesüir aser mangur, anungji pa kanga ratar ken-kenbo mangatonga mapa nungji nokdak danger, saka la tu mesüir, pa temulungjang tip matemer joko itaka shi süia ao. Kenü ajungbena ka ayirlaji aruya angu. Wangshiba; Aya tzükonglar, ya koda asü?

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger agateta agitsü mepishir

Jordan aser Evangelical lenirtemi Khristan tourism atema jembi



January 19, 2026 nü Jordan yimtiba, Amman nung (abelen nungi) World Evangelical Alliance Secretary General Rev. Botrus Mansour, Jordan Minister of Tourism & Antiquities Imad Hijazeen, Bethlehem Bible College nungi Rev. Dr. Jack Sara aser Rev. Dr. Nabeeh Abbasi nunger senden amenba sülen tangokba noksa nung angur.

Amman, January 26 (Agencies): Khristan temeshi aini aoertem aikati Jordan semdangba ajanga iba linük nung Khristan tourism ajungkettsütsü atema January 19, 2026 nü Jordan yimtiba, Amman nung Jordan minister den Evangelical lenirtem senden menogo.

Iba senden nungji World Evangelical Alliance (WEA) Secretary General Rev. Botrus Mansour, Jordan Minister of Tourism & Antiquities Imad Hijazeen, Bethlehem Bible College nung Tir Rev. Dr. Jack Sara aser inyaker aser World Baptist Alliance for the Middle East ambassador Rev. Dr. Nabeeh Abbasi nunger aden, ta Jordan Ministry of Tourism-i sangdong ka ajanga metetdaksü.

Khristan puti otsü dak sendakba nung tongtiban sentong aika agitsü lia Jordan-i telemtetba aika agia renemshidar.

Khristan temeshi aini aoertem atema Jordan nung tourism ajungkettsütsü nükjidong nung Jordan-i ayongzüka evangelical lenirtem den senden amen.

Talisa Yisu Khrista baptiba

sülen küm 2,000 ajungbamong 2030 küm amongtsü. Tesüiba küm ishika tsüngda Jordan-i Bethany Beyond the Jordan densema Khristantem atema tongtiban tesem aika nung terenlok mapa inyaka arudar.

Ministry of Tourism & Antiquities-i sangdong ka ajanga, Minister Hijazeen-i World Evangelical Alliance (WEA) nungi lenirtem jaoka temeshi ainlen jajar Khristantemi Jordan semdangba ajungkettsütsü atema jembiogo, ta metetdaksü.

Iba senden nungji alima tesem balala nungi Khristantemi Jordan semdangba ajungkettsütsü atema jembi, talisa Yisu Khrista baptiba sülen küm 2000 ajungbamong 2030 küm Jordan nung amongtsü lir, ta kasa sangdong ajanga metetdaksü.

World Evangelical Alliance Secretary General Rev. Botrus Mansour-ia Jordan nung Khristan tourism ajungkettsütsü atema maongka anguba atema pelaba lemsatep.

WEA secretary general ya Nazareth nungi lir aser pai mapang shia Jordan semdang.

Rev. Mansour-i, "Ni Nazareth nungi Palestine

nunger ka, aser ni asoshi Amman yimti ya Ramallah ama lir," ta ashi.

Osangbener den jembidang Jordan Baptist Convention nung tongti aser World Baptist Alliance for the Middle East ambassador, Abbasi-i, iba senden nung tebilemba sadoksadoka lemsatepba atema pelar; Khristan puti otsü nung Jordan ya kanga tongtiban, ta ashi.

Paisha, "Onoki longjemer project balala inyaksü, senden ayongzüka agitsü aser temeshi ainlen jajartem atema sentong ayongzüksütsü atema jembiogo. Ibaji ajanga yimsü dak sendakba tourism ajungkettsüba dang masü saka sobaliba-a lemsateptetsü," ta ashi.

Bethlehem Bible College nung Tir Rev. Dr. Jack Sara-ia, "Iba senden nung amalitepa inyaksü atema jembiogo. Evangelical Khristantem tajangzük angutsü atema lenla balala nung Jordan den yariteptsü yongyar," ta metetdaksü.

Rev. Sara ya WEA Middle East & North Africa regional chapter nung Secretary General lir.

India nunga Khristantemi 'Christian Unity' hopta mongogo

January 26, 2026: Küm shia January ita nung alima tesem balala nung Khristantemi tamangertem telongjem atema sarasadema amonger; yamaji India nunga Khristantemi January 18 nungi January 25 tashi 'Week of Prayer for Christian Unity' monga Tenla kidang aser pei kidang Khrista sülen anidakertem ka kuma longjemtsü atema sarasademogo.

Kolkata nunga Baptists, Catholics aser Protestant Khristantem Baptist Mission Church nung adenshia sarasadema mongogo aser Delhi nunga Khristantem adenshia tekülem agia sarasademogo.

Taküm iba hopta omenji Efesa 4:4 "Temang ka aser Tanela ka lir, oda nenoka nenok ajaba teimla ka nung aja" liasü.

Tenar Paul-i asenok dang telongjemji asen shisatsü agi asalentong yanglua renemba ka masü, saka iba ya Tanela nung tera-yanga aliba sempet ka lir, koba ajanga Arogo nung tangu apuoktsür, ta nenshia metetdaksür.

Iba denji külemi asenok dang nungi langka akhanger-temelung meyiptsü, tai atoktsü aser tebilemba balala liaka longjemer jajatsü atema tasütait tanela akhanger.

2026 küm atema tayongzükbatemji Armenian Khristantem nungi lir. Putu aika

timtem ajangshiaka Armenia nunger Khristantemi pei tamang jenjang manokshiba nung tepor ajung aser amangba jenjangji meteta dang lir.

India nunger Khristantem atema iba osang ya kanga taret. India nung Arogotemi sensakertem mesür, tanurtem nem shisaliok agütsür, shirangertem yarir aser tangar memenepertem atema jembija arur.

World Council of Churches (WCC)-i alima atesem balala nung Khristantem dang 'Week of Prayer for Christian Unity' nung shilem agitsü ayongzüka liasü aser iba anogomong atema Lai tekongtem aser sarasadem onüktemji YouVersion Bible App ajanga lemsatep.

ANOGO ABEN TSÜNGREM DEN

Taochi, temeim, telungjem

"Kibuba Yisu Khrista taochi, aser Tsüngrem temeim, aser Tanela Temeshi tadenba nenok ajak den liang." 2 Korint 13:14.

Tasen Lai nung taochiji sempet (gift) nungi adokba o lir. Tsüngrem sempettem ajak taochi agi alepbanga lir, aser Tsüngrem taochi ajak Kibuba Yisu Khrista nungi angur. Pa dak talubosa alibaji kü meyong !

Tsüngrem temeim kü den lir, kechiaser Pa temeim tabensaji kü meyong Lir. "Tsüngrem temeim lir; aser shibai temeim nung alir, pai Tsüngrem dak alir" (I Yn.4: 16). Khrista asenok den ali nung asenok den Tsüngrem temeim mali ta ashitsü makok. Khrista temeim makaba tetezü asenok Khrista maka.

Tanela Temeshi telungjem akar kechiaser Tanela Temeshi kü dak alir. Telungjem jagi asenok külemi Khrista nung shilem agiba indang jembi. Yisui netsüngtem dang Tanela Temeshi-i Pa indang ajak ashitsü ta ashi. Asenoki tasü itta taochi menden dangi arutsü dang nüngdak, aser Khrista akaba aser sentsüwangshi nungi Tanela Temeshi-i kechi lemsar, aji agizüktsü tenüngdaksü, "Amen."

Iran tsür Khristan aianu ana chiokogo



St. Thomas Arogo nung pastor, Rev. Fran Gardner-Smith-i (ajichi) Mojan Motahari (tiyong) aser Mahan Motahari na agizükba noksa nung angur.

January 26, 2026: Virginia, US nung Iran tsür Khristan aianu ana tesüiba ita ana tashi ICE detention centre nung ayuba sülen chiokogo.

Mahan Motahari aser Mojan Motahari na ya McLean, Virginia nung aliba St. Thomas Church nung züngsem lir.

Iran nung tenati Islam yimsü toktsür Khristan yimsü agizükba ajanga reshikangshi marem tena US-i jena aoba sülen yangji tejenokdak asüngdanga liasü.

Arrshi küm 31 Mojan Motahari January 17, 2026 nü chiok aser teyi, Mahan Motahari (38) January 21, 2026 nü chiok.

ICE agent temi tena apuba mapang nungbo tena United States nung alitsü temelaba liasü.

St. Thomas Arogo nung pastor, Rev. Fran Gardner-Smith-i, Mahan aser Mojan na ya temeim aketba nisung aser nisung kanga tajung, ta metetdaksü.

Rev Fran Gardner-Smith-isa, "Tena apuba ajanga ni melung kanga yirua liasü," ta ashi.

December 1 nü tena Virgin Islands-i aoba sülen ICE agent temi apu aser Pompano Beach, Florida nung aliba Broward Transitional Center nung puoka liasü.

Tenaprong ket nung mapa inyaksü temelaba (work permits) liasü aser tawa ang U.S. Citizenship and Immigration Services-i permit ji renew süja liasü.

Pastor Gardner-Smith-i aianu anaji chioktsü atema jembia aruogo aser la den Diocese of Virginia-ia yaritepa liasü.

Gardner-Smith-i January 5 nü detention center ji semdangteta tena ajurua liasü aser January 6 nü court ka nung ken o angadanga mapang nung la den Bishop Mark Stevenson naprong liasü.

Rev Gardner-Smith-i, "Aianu ana chiokba atema ni kanga pelar," ta ashi.

Osang angazükba agi, tang ICE Detention centres nung nisung 66,000 jungnüa pua lir saka parnok shilem 33 bo ozüing alema inyakba ken o nung aija mali.

AO OSHI ANGAZÜKDAK:**TANÜ ANGAZÜKTSÜBA OJANG****Tutettsü**

(adj) odia jangjashitsü (expose a person publicly)

* Telok nung mendenbubai aibelen aising tutettsü.

Tutiozü

(n) topur tajung ozü tuluka (peacock)

* Tuytiozüi kanga junga tsünga sayur

OLONG PAITEP # 7396

1						2				3
								4		
5		6				7				
8										9
								10		
				11		12				
		13								
14						15				
				16						

TIPLIN

1. Ojembitsü tashi - 8
5. Süngjang tapu ka - 5
7. Tekanük nung enokba - 5
8. Teka amtep - 5
12. Tzüik asendak - 5
14. Tsünpang tema aliba - 5
15. Ken atenba yimya - 5
16. Asangur - 8

LANGTSÜNGLEN

1. Tepok telung nung shilem ka - 7
2. Tamajung aküm - 5
3. Chi den külemi achiba - 3
4. Meimchir alimai aruba - 3
6. Laishiba nung ayong ka - 4
9. Tarutsü nükla - 7
10. Tamendakdak/Nükjiong - 4
11. Tenük-telen mejungi aküm - 5
13. Terok nungi adokba - 3
14. Meimchir telemisa - 3

OLONG PAITEP # 7395 TELANGZÜBA**TIPLIN :**

1. Taa, 3. Teküm, 6. Aibelen, 7. Aut,
9. Ajizük, 10. Ojala, 11. Semer,
13. Sen, 15. Kioktsü, 17. Itsük,
18. Kar.

LANGTSÜNGLEN :

1. Tai, 2. Asensor, 3. Tanü, 4. Kua,
5. Mitsüktsü, 6. Azübenshi,
8. Lah, 9. Jangkok, 12. Akok,
14. Nashi, 16. Sür.


NAI-A YA METETTER

American rock climber Alex Honnold-i January 25, 2026 nü süngzü mesüra protective equipment kecha medeni Taipei 101 skyscraper kolak tonga tutetogo.

Honnold-i minute 90 shi agia 508-meter (1,667-foot) tower kolak tonga atu.

2017 küm Honnold-i Yosemite National Park nung El Capitan (900 metre Freerider route) mezüng tutetba ajanga alimai meteta aküm.

Pai El Capitan kolaki atuba indang Free Solo ta ser documentary ka ajanga Academy Award ngutetogo.

Assam nung süngolu nung mapa inyaker tem mesüzüker

Tinsukia, January 26, 2026

(Agencies): Assam nung Assembly elections agitsü mapang tonga arudang Chief Minister Himanta Biswa Sarma-i Deobarnü süngolu nung mapa inyaker tem asoshi welfare initiative ka sangdongogo.

Chief Minister Sarma-i Doomdooma constituency kübok Samdang nung Koli Duti Paat scheme tenzüka osang metetdaksü.

Iba scheme kübok Assam nung süngolu nung mapa inyaker shia nem Rs 5,000 one-time cash assistance agütsü.

Iba scheme atema Rs 302 crore lezmüka lir aser tea tribe o Adivasi nung dak rangloker sorkari tenzüko.

Tea tribe aser Adivasi nung ya Upper Assam district tem nung kanga bulua lir aser parnoki Assembly elections nung shilem tulu agir.

Parnok ya Tinsukia, Dibrugarh, Charaideo aser Golaghat district tem nung kanga lir.

"Assam nung küm 200 tain tea industry nung süngolu nung mapa inyaker tem tongti shilem agia arur aser iba sector nung parnok tiyongtsü lir" ta Sarma-i ashi.

Iba sentong nung Tea Tribes Welfare Minister Rupesh Gowala, MLA Suren Phukan, MLA Bolin Chetia, MLA Bhaskar Sharma, aser MLA Sanjoy Kishan nung den labour aser finance department nungi ketdangsürtem aden.

Chief Minister indang sentong nung adenba sülen Digboi MLA Suren Phukan-i Pawoi Tea Garden nung tea workers 2,619 nem Rs 5,000 cheques lema agütsü.

Ajisüaka, CM Sarma indang osang ya süngolu nung mapa inyaker aikati magizüker.

Assam kübok Brahmaputra Valley nung süngolu nung mapa inyaker tem anogoshi taa Rs 250 shi lir. Assam Tea Corporation Ltd kübok süngoludem nung inyaker nem Rs 250 shi agütsü. Parnok Rs 220-232 shi agüja liasü aser October 2025 nungi

taa tur agüja arur. Ajisüaka süngolu nung inyaker tem aser union temi Rs 351 mesüra iba den teimba akhangar.

"Küm 200 tashi inyaka arur Rs 5,000 agütsür. Temenünütsüka. Parnoki Rs 551 taa agütsüra, süngolu nung inyaker tem renloktsü. Iba ya assembly elections matongdang mesüzüktsü merangba mapa ka dang lir" ta mapa inyaker Rajveer Tanti-i ashi.

Assam nung süngolu nung mapa inyaker tem ya tongtipang constituency tem nung prokshia lir aser parnoki election nung shilem tulu agir.

Congress-i küm 15 tashi yimsü süa aruba 2016 assembly elections nung BJP-i takok tulu ngua anendakja liasü. Iba ya BJP-i tea belts nung welfare tenangzükatem agiba ajanga liasü.

2021 nunga BJP-i free rice, financial aid for pregnant women, aser wage adjustments amala scheme ajanga tea worker teyari ngua menden 60 nguteta maneni sorkar aküm.

Mizoram nung Sep 2025 nungi Jan 13 tsüngda drug aika apu

Aizawl, January 26, 2026

(Agencies): Mizoram aser idaki aliba nübortem asoshi tsükchir tulutibaji drugs lir aser sorkar o loktilibaji iba anema inyaksüla ta Chief Minister Lalduhoma-i ashi.

Mizoram nung anti-drug operations inyaka aruba meyipa repringshitsü atema senden ka nung Chief Minister Lalduhoma-i iba olen jembi.

Iba senden nung Home Minister K. Sapdanga, Excise

and Narcotics Minister Lalthanliana Hmar, Home aser Excise department tem nungi ketdangsürtem aser Mizoram nung civil society organization tulutiba Central Young Mizo Association (CYMA) teshimtet nübotem aden.

Excise department aser CYMA yaritepa yaküm September 22 nungi 'Operation Jericho' kübok anti-drug drive maparen tulu ka tenzüka liasü ta CM Lalduhoma-i ashi.

"September nungi January 13 tashi iba maparen inyaka arudang Rs 196.42 crore jenjang drugs aser narcotics puogo. Drugs ajanga lanurtem dang masü saka Mizo nung ajunga atema lendong bentsür arutsü" ta Chief Minister-isa ashi.

2025 küm Mizoram nung drug dak sendakba ken o 319 benoka liasü aser iba ajanga ozüng amertemi khuret ajuruba sayur, ta paisa shisem.

Longding nung ali acre 8 nung poppy alutem raksatsü

Itanagar, January 26, 2026

(Agencies): Arunachal Pradesh kübok Longding district nung security forces-i ali acre 8 tema nung poppy alu raksatsüogo.

"India-Myanmar arrtsü anasa aliba Votnu aser Khasa yimtsüngtem nung poppy alutem puteta raksatsüogo. January 23 nü anti-narcotics drive ka nung shilem ka ama iba mapa inyaker" ta Longding Superintendent of Police (SP) Dekio Gumja-i ashi.

Iba maparen ya Pangchau circle executive magistrate ketdangsüba kübok inyaker aser jungjunga asadanger ang inyaka liasü ts SP Gumja-i ashi.

Poppy alutem jangjatsü atema surveillance aser aerial surveys nung drones amshi aser iba ajanga jangjateter poppy alutem raksatsü ta paisa ashi.

"Poppy alu ayimertem anema ken o kecha mebenok kechiyong parnoki poppy tsünüba ya ozüingi memelar ta

memeteti liasü. Drugs ajanga timtem agütsüba osang onoki yimdaklirtem dang sangdongtsü aser tang tsünüsenbong anepalutsü ajungmesotsü" ta Gumja-isa metetdaksü.

Artsülen aliba yimtsüngkar nungbo poppy alu ayimba ya sobaliba ka ama benshia arur aser aluyimer aikati parnok achitsü atema ayimer. Iba inyakyim azüoktsü atema awareness campaigns agitsü ta ketdangsürtemi ashi.

Philippines rong lendong nungi nisung tasü mang 15 ngutetogo



Manila, Aenjeti/January 26 (Agencies): Nisung 350 dak tema mena aliba rong ka Hombarnep southern Philippines nung asetkong ka anasa tzü telungi alu. Tekumzüker temi passenger 316 takum kumzüik aser nisung tasü mang 15 ngutetogo ta ketdangsür temi ashir.

Asetkong balala tsünga khu aser passenger belenba rong M/V Trisha Kerstin 3 ya Zamboanga yimti nungi rongnendak tesem nungi south tsütsü Sulu province kübok aliba Jolo asetkong-i passenger 332 aser rong ketdangsür 27 mener aoba mapang technical timtem ajurua ayatirm sülen tzüyim telungi alu, ta coast guard ketdangsür temi ashir.

Rong ya Basilan province nung aliba Baluk-baluk asetkong yimtsüng nungi kilometer ana shi pilar tzüngsang-mopung junga lia makepok, ta coast guard

Commander Romel Dua-i ashi. "Iba rong nung coast guard safety officer ka liasü aser pai rescue vessels yoktsü atema onok nem mezüng osang agütsü," ta Dua-i ashi aser safety officer yabo takum kumzüik ta metetdaksü.

Ammang nung rong ya kanga kera makep aser tzü telungi alu aser iba mapang pa aser pa kinungtsü densema nisungtem tzü nung tsük, ta iba lendong nungi takum kumzüiker Mohamad Khan-i ashi. Pa kinungtsü ya par tanur ita trok ka ajunga liasü, aser kinungtsü tena kumzüik saka kinü tanur ya tzü nung arakseta asü.

"Kü kinungtsüi ozü tanur ajunga aliba tsük aser onok ajak tzüyim nung balala akum," ta Khan-i volunteer rescuer Gamar Alih dang ashi.

Coast guard aser navy ships tem den surveillance plane ka, air force Black Hawk helicopter ka aser ango apudang amshiba

rong temi Basilan anasa search and rescue operations inyaktar, ta Dua-i ashi.

Coast guard temi passenger 316 kumzüikogo aser nisung tasü mang 15 ngutetogo ta ashi.

Kechi ajanga rong ya makepokar mejangja aser bushisingdangba alitsü, aser rong ya Zamboanga rongnendak nungi mainshidang coast guard temi temelaba agütsü aser iba rong nung nisung tali amenba meliasü, ta Dua-i ashi.

Philippine nung tzüyim lendong ya mapang shia ajurur, kechiaser yimpru tesashi, rong junga anepalu masüba, nisung tali amenba aser safety regulations shidak mamshiba nungi item lendong ya ajurur.

December 1987 nung Dona Paz rong ka central Philippines nung totzü abenba rong tulu ka den tsüktepa nisung 4,300 dak tema asü, koba alima nung yimjung mapang rong lendong tesashitiba liasü.

US Secretary of State Rubio-i Iraq PM den jembi

Washington, Aenjeti/January 26 (Agencies): ISIL (ISIS) den sendaktepa aliba pua alirtem Syria nung Iraq-i belener aoba sülen United States Secretary of State Marco Rubio-i Iraq Ato Kilonser Mohammed Shia al-Sudani den jembi aser Baghdad dang Iran nungi pila alitsü ajungshia liasü, kong Washington aser Tehran tsünga mangatettep tulu adoka lir.

US Department of State ajanga osang ka sangdongba nung Rubio aser al-Sudani ya Deobarnü jembi aser iba mapang ISIS kiralongrar tem belenba aser pua ayuba maparen inyakba atema US ketdangsüri Government of Iraq nem tenüngsang agütsü ta ashi.

Bodhbarnü US mitkari Hasakah, Syria nung detention facility ka nung yua aliba nisung 150 tashi Iraq nung tesem kati anir ogo, ta ashi, kechiaser Syrian army ajanga Kurdish nungeri aniba Syrian Democratic Forces (SDF) nungi alinük tali rakzüktar. US

mitkari nisung 7,000 tashi Iraq-i bener aotsü sentong lir.

Iba mera ya ajanga Syria nung Us-i ISIL anema raraba nung yimya melenshiba ajiteter. Küm ter shi Washington-i SDF dak metaloker liasü, shirnok US-i training agüja aser nok-nü agüja liasü, saka 2024 küm tatemlen Syria Tir Bashar al-Assad atsüngdokba sülen tangbo parnoki Syria sorkar tasenba den teka amteper.

Telephone ajanga jembiba sülen Iraq sorkari sangdong kecha agüja mali.

Küm ter dak tema sülen Nouri al-Maliki ya ato kilonser ka ama tanaben inyaksü imla aliba mapang Rubio-i Deobarnü ato kilonser den jembia liasü. Al-Maliki ya 2006 küm US teyari nung ato kilonser akum, saka Iraq nung ISIL jatettsüsa sectarian policies amshiba sülen US den tesendaktep mejungi akum.

US-i 2003 küm Iraq amak aser iba linük nung yimtenren tsütsü mepetmesü adoka al-Qaeda ya tashi ita akum aser mapang tatsüka lir ISIL ya

wangshia akum. US sepaitem 2009 küm ainshi saka Iraqi security forces nem training agütsütsü atema US sepai kar yangji liasü.

2011 küm tanüngba US-i aniba coalition forces ya Iraq nungi ainshia rara tembangba sangdong, kong nisung 275,000 shi tepseta linük kanga mejungi raksatsü.

ISIL den raratsü asoshi ano 2014 küm US sepai 5,000 shi yok, saka parnok ainshiogo ta Iraq sorkari tan ita ashi.

Kasa mapang US-i par mitkar indang hadir tem Middle East leni belener aor. Brehostibarnüa Tir Donald Trump-i Iran dak rangloker raradang amshiba rong telok tuluka Gulf leni otar ta shia liasü.

December ita tatemlen nungi Iran nung longkak aitba mapang Trump-i mitkar amshia teka sangshitsü aiben amokmeren, aser Tehran-ia telangzüba agütsütsü nangzüik. "Onoki Iran reprangtar. Sepai telok tuluka Iran tsütsüi otar," ta Trump-i ashi.

Hostage tatembangbuba tasü mang anguba sülen Rafah crossing lapoktsü

Jerusalem, Aenjeti/January 26 (Agencies): Hamas puri pur aoba Israel nungertem rongnung tatembangbuba tasü mang ngutetba sülenang Israel-i nüburttem senzüdaksütsü asoshi Egypt den Gaza indang Rafah crossing lapoktsütsü, ta Ato Kilonser Benjamin Netanyahu indang office sangdong ka ajanga Deobarnü metetdaksü.

Iba arrtsü ya October ita Israel aser Hamas na tsünga ceasefire benokba sülen mapang tatsüka dang lir lapoktsü liasü, saka tang tashi melapoki lir.

Ajisüaka Israel-i, Gaza nung Palestine nunger telungpur telok balalai pur aoertem ajak mechiok tashi aser Hamas-i parnoki pur aoer tasü mangtem bushiteta meyok tashi arrtsü nung crossing melapoktsütsü ta ashi.

Pur aoertem ajak chiokogo, saka police officer Ran Gvili indang tasü mang tang tashi magütsü lir. Israeli military-i Deobarnü ashiba agi, parnoki

Ran tasü mang bener arutsü atema northern Gaza nung inyakyim ka tenzüikogo. Kasa mapang nung Israel military ketdangsür kati ashiba agi, pa rema alitsü ta bilemba tesem dak sendakba nung itangitertemi osang ishika agütsüogo.

Israeli military-i tang Master Sgt. Ran Gvili meyipa anir aotsü asoshi takokba tashi jenjang agidar, ta Netanyahu indang office sangdong ajangsa metetdaksü.

Iba inyakyim tembangba sülen Israel-i Rafah Crossing ya lapoktsütsü, ta kasa sangdong ajanga metetdaksü.

Brehostibarnü transitional Palestinian committee tekolakba Ali Shaath-i ashiba agi, Rafah Crossing ya iba hopta lapoktsü. Gaza nung alir nisung million 2 dak tema atema Gaza nungi ili adokli asütsü asoshi iba lenmang kija lir.

Gaza tsütsülen iba crossing ya Israeli military-i 2024 küm nungi azüoker lir.

Venezuela nung tepuoker 104 chiokogo



Caracas, Aenjeti/January 16 (Agencies): Venezuela nung ketdangsürtemi yimden yimsüsüba dak sendakba nung apurtem ta züngoksema aliba nisung 100 dak tema chiokogo, ta rights group kati metetdaksü. Chiokertem rongnung obendanger ka densema liasü, shiba 2024 küm detention facility ka nung client tem semdangba sülen pua liasü.

Caracas nung amendaker aliba Foro Penal-i ashiba agi, Deobarnü tepuoker 104 chiokogo aser ano timba chioktsü imlar.

Parnoki ashiba agi, chiokertem rongnung obendanger Kennedy Tejeda aser communications kaketshir, Juan Francisco Alvaradonata densema liasü.

Tejeda ya obendanger aser human rights activist ka lir aser pa ya 2024 küm August 2 nü Carabobo state nung yimden yimsüsüba dak sendakba nung puoka ayurtem nem teyari agütsütsü asoshi detention centre ka semdangba mapang tatemsa ngua liasü, ta NGO yagi ashi.

Foro Penal tatong tir Gonzalo Himiob-i ashiba agi, tepuokertem kwi chiok aji tejangjabo memetet aser timba alitsü akok.

Venezuela indang acting tir Delcy Rodriguez-i, Nicolas Maduro yimsüsüba mapang puoka ayurtem chioktsü ta tenangzüikba agütsüogo.

Rodriguez-i ashiba agi, tepuoker noklang aika chioktsü atema jenjang agiba ya political inyakyim tasen ka tenzüiker asütsü. Item tepuokertem ya 2024 küm tir election sülen Maduro anemertem lir.

Venezuela sorkari hopta ishika tsünga tepuoker 600 dak tema chiokba sangdongogo, kong Venezuelan opposition lenir Edmundo Gonzalez'er jala kuinungbo Rafael Tudares Bracho densema lir.

Rights teloktemi sorkari tepuoker chiokba sangdongba ashishia aruogo aser Foro Penal-i ashiba agi, ketdangsürtemi ashiba ama masü saka tepuoker tesadang dang chioker lir.

Rodriguez-i taoba hopta ashiba agi, lai United Nations High Commissioner for Human Rights, Volker Turk den Hombarnü jembia UN dang tepuokertem chiokba ya jangjashitsütsü mepeshitsü ta ashi.

Foro Penal-i ashiba agi, January 19 nü tashi nung Venezuela nung yimden yimsüsüba dak sendakba nung puoka ayur 777 lir.

Nagaland tebur team 3x3 National Basketball C'ship nung asayatsü



Dimapur, Aenjeti/January 26 (TYO): Nagaland Basketball Association (NBA)-i sangdong

Championship nung asayatsü ta metetdaksüogo.

Iba asayamung ya tetsür aser tebur naprongla atema asütsü, aser Delhi nung January 29 nungi 31 tashi asayatsü.

Taküm squad nung lanur asayartem dang lir, koba Nagaland basketball tarutsü lir.

Tarutsü asoshi nükla yur team shimogo, kong sempet aser temulungtetba tulu akteba asayartem lir, aser item asayartem ya national jenjang nung parnok sempet sayatsü asoshi renema lir.

Team Squad

- Sedeneituo Kuotsu
- Theyieneilhou Rutso
- Cuwe Mero (Vice Captain)
- Keneitseizo Belho (Captain)

Team nung captain ji Keneitseizo Belho aser vice captain Cuwe Mero asütsü, aser parnoki Delhi nung iba asayamung nung takokba tashi toktepa asayatsü imlar. Team ya January 27 anepdang Dimapur nungi apusoa aotsü.

8buba National Masters Games nung Mokokchung-i shilem agitsü



Dimapur, Aenjeti/January 26 (TYO): 35+ Mokokchung Football League nungi veteran football asayar 16 coach ka aser team manager kati anir Nagaland tenüing nungi National Masters Games nung asayatsü atema Pune-i apusoaogo.

Iba asayamung ya Super Masters Games & Sports Federation of India-i ayongzük aser January 27 nungi 31 tashi Pune nung asayatsü.

Iba asayamung ya Super Masters Games & Sports federation tawabangba kübok asayatsü. Taküm Nagaland-i tebur football team asem yokogo: Dimapur nungi 40+ team aser Mokokchung nungi

ta Team A & B aser Kohima nungi 50+ team.

40+ Mokokchung team ya team manager Tatongrenla aser coach Mohan Ram Bhadu nati anirogo. Mokokchung team nung asayar 16 lir.

Iba asayamung nung shilem agitsü mao tsüngda team ya practice sessions aiben agiogo aser Morning Premier League, Kohima aser 35+ Mokokchung Football League nungi tanga asayartem den aiben asayaogo.

Mokokchung Team squads:

1. N Jamonger Ao
2. N Chuba Phom
3. Lanuchuba walling
4. Sentiyanger
5. Tsüpongtsüba
6. Tiayanger

7. Chumaksangba
 8. Tiatoshi Imchen
 9. Zululemba Ao
 10. Repamangyang
 11. Imliyapang Jamir
 12. L Moakaba
 13. Talilepba Jamir
 14. Onen toshi
 15. Chubangngnen Imchen
 16. Sakutemjen AO
- Team jersey ya January 24 nü Senior Superintendent of Police, Mokokchung, Nagaland Vesupra Kezo NPS-i sayaja liasü.

Football nung master category ana den iba asayamung nung Hockey, Yoga, Hockey, Athletics, Kabbadi, Powerlifting, Swimming, Weight lifting nungera asayatsü.

Kerala Blasters-i striker Kevin Yoke alizükogo



Aenjeti/January 26, 2026

(Agencies): France nunger left-winger Kevin Yoke Indian Super League 2025-26 season atema Kerala Blasters puri Hombarnü alizükogo. Pa Greece nung League 2 nung asaya liasü, kong pa PAE Chania nungi tekuben asayaogo.

ISL February 14 nü nungi tenzüksü ta sangdongba sülen York ya club indang team nung züngoksemba tesüsabuba asayar kümogo. Kerala Blasters puri taoba mapang Germany nunger attacking midfielder Marlon Roos Trujillo alizükogo.

Yoke ya feet 9 ser inch 9 talang asayar ka lir, shibai tetsüng anapronglai ball kanga junga metsüa asayateter, pa Greece nung season asem asayaba sülen tang Kerala Blasters nung denogo. Greece nung asayaba mapang pai goal asem aser assist 11 süja liasü.

"Kevin ya onoki asayanüba asaya atema tapet asayar ka lir. Pai defender tem den sütepa asayatetba, pai tesem

tuluka ayimjema asayatetba aser professional jenjang nung pa tajangshiba yagi team akangshidaksütsü," ta Kerala Blasters CEO Abhik Chatterjee-i ashi.

Kerala puri taoba mapang forward Koldo Obieta aser Tiago Alves na alizükogo. Tenaprongla Super Cup nung asayaogo. Ajisüaka league asayatsü masayatsü mejangjaba ajanga club group-stage nung tsükatokba sülen toksür ao.

Yoke ya tabelenlen asayaba winger ka lir saka pai tachichilena asayatter. Pa PSG youth system nungi anitet aser pa indang career nung mapang timba ka Greece indang league nung Levadiakos aser PAE Chania nungi asayaogo.

Yoke-i defender tem kanga junga atsür oa asayateter aser iba ajanga team nem teyong nung maongka agika agütsür. Pai tetsüng anapronglai ball kanga junga belenshia asayateter asünung ground nung mashika len nungi ball kanga junga agütsüteter.

A026: Shelton, Sinner, Swiatek, Pegula nunger quarter-i iogo

Aenjeti/January 26, 2026

(Agencies): Melbourne nung tang asaya aliba Australian Open tebur kija asaya nung American nung eighth-seeded asayar Ben Shelton-i set pezü asayaba sülen Casper Ruud koka quarter-final tongtetogo.

Asaya nung mezüngbuba set makokba sülen Shelton-i meyipa tur asaya ya 3-6, 6-4, 6-3, 6-4 agi koka liasü.

Iba asaya akokba sülen pa quarter-final nung Jannik Sinner den asayatsü, shibai Luciano Darderi kokogo.

Round pezübuba asaya nung iba asayamung tesüsabuba anaporongla koker alisang Sinner-i külem Italy nunger asayar Luciano Darderi ya 6-1, 6-3, 7-6(2) agi koka liasü.

Arishi küm 23buba nung Sinner ya Open Era nung tebur Grand Slam asayamung nung tekuben mesüra iba dak timba ben quarter-finals tongtetogo.

asayaba asayar tanobutiba rongnung tasembuba kümogo. Pa Pete Sampras aser Novak Djokovic na sülen tasembuba jenjang nung lir.

Kasa asayamung tetsür kija asaya nung Iga Swiatek-i Australia tsür qualifier Maddison Inglis 6-0, 6-3 agi kokogo. Iba asaya akokba sülen la quarter-final nung fifth seed Elena Rybakina den asayatsü. Tena tang agi 12benbuba asayatsü lir.

Poland tsür la yagi tang tashi nung Australian Open khen danga koka mali, saka taküm la asayaba yimya reprangra la iba asayamung akoktsü imlar rongnung ka kümogo.

Maneni tetsür kija asaya nung Homabarnü Rod Laver Arena nung Jessica Pegula-i defending Australian Open champion aser medemer Madison Keys 6-3, 6-4 agi koka quarter-finals tongtetogo.

BILEMDANGANG

"Akümstübu magütsütetra aküktsübu meyipa angutsü timla."